

四庫全書

史部

欽定四庫全書

史部

文獻通考卷三百二十八

九

詳校官閣學士_臣瑞保

編修_臣程嘉謨覆勘

覆校官中書_臣孫希旦

校對官中書_臣田尹衡

謄錄監生_臣徐敷

欽定四庫全書

文獻通考卷三百二十八

鄱陽馬端臨貴與著

四裔考五

南

杜氏通典邊防總序曰南蠻其在唐虞與之要質故曰要服夏商之時漸為邊患暨於周代黨衆彌盛故詩曰蠢爾荆蠻大邦為讐言至楚王時蠻與羅子共敗

楚師殺其將屈瑕

莫敖不設備故敗繼於荒谷犀帥因於治父

楚師復振

遂屬於楚及吳起相悼王南并蠻越遂有洞庭蒼梧

之地

今長沙衡陽等郡也

秦昭王使將伐楚略取蠻夷置黔中

郡

今武陵澧陽及黔中五溪中諸郡地

漢興以後時有寇盜其西南諸

夷夜郎之屬悉平定置郡縣

今夜郎播州地為即古夜郎地

公孫述

時夜郎大姓為漢保境後漢初從番禺江奉貢光武

建武中武陵蠻帥單程

今武陵澧陽黔中寧夷盧溪等郡即漢武陵郡

大寇

郡縣漢將劉尚戰敗數歲方平順帝時武陵太守增

其租賦蠻又舉種反殺鄉吏東晉時沔中蠻因劉石
亂後漸徙於陸渾以南偏滿山谷宋齊以後荆雍二

州

今荆南江陵郡
雍州襄陽郡

各置校尉以撫寧之羣蠻酋帥互

受南北朝封爵至後魏末暴患滋甚僭稱侯王屯據
峽路斷絕行旅周武帝遣陸騰大破之其獠初因蜀
李勢亂後自蜀漢山谷出侵擾郡縣至梁時州郡每
歲伐獠以自利及後周平梁益

梁漢川
益蜀川

自爾遂同華

人矣以其黔中東謝西謝自古不臣中國唐貞觀以

後置羈縻州領之

盤瓠種

盤瓠種昔帝嚳時患犬戎入寇乃訪募天下有能得犬戎之吳將軍頭者妻以少女時帝有畜狗名曰盤瓠遂

銜其將軍首而至乃以女配之

杜氏通典曰按范曄後漢史蠻夷傳皆怪誕不

經大抵諸家所序四夷亦多此類未詳其本出且因而高略之曄云高辛氏募能得犬戎之將軍頭者購黃金千鎰邑萬家妻以少女按黃金周以前為斤秦以二十兩為鎰三代以前分土自秦漢分人又周末始有將軍之官其吳姓宜自周命氏曄皆以高辛之代何不詳之甚又宋史曄被収後於獄中與諸甥姪書自序云六夷

諸序論筆勢放縱實天下之奇作其中合者往往不減
過秦篇嘗共比方班氏非但不愧之而已按班賈序事
豈復語怪而曄絀謬若此盤瓠得女負走入南山在國

又何不減不愧之有乎

盤瓠得女負走入南山

在國之南

即五溪之中山

止石穴中生六男六女因自相夫妻織績木皮

染以草實好五色衣服製裁皆有尾形衣裳斑斕語言

侏離其後滋蔓號曰蠻夷有邑君長名渠帥曰精夫相

呼為妣徒

說文曰妣女人自稱妣我也烏郎反

所居皆深山重阻人跡罕

至長沙黔中五溪蠻皆是也

一辰溪二酉溪三巫溪四武溪五沅溪

秦昭

王使白起伐楚略取蠻夷始置黔中郡漢興改為武陵

郡

今武陵澧陽縣中寧夷盧溪盧陽靈溪潭陽郡地皆是也

歲令大人輸布一疋小

口二丈是謂實布

說文曰實南蠻賦才冬反

雖時為寇盜而郡國討

平之後漢光武建武二十三年十二月武陵蠻精夫相

單程等大寇郡縣遣武威將軍劉尚發南郡

今江陵巴東夷陵

長沙

今長沙衡陽巴陵郡

武陵

今澧陽武陵縣中郡也

兵萬餘人乘船泝流

自沅水入武溪擊之

沅水出牂牁故且蘭東北經靈溪長沙巴陵郡入洞庭通江也武陵

溪在今盧溪郡靈溪縣

尚輕敵深入悉為所沒又遣伏波將軍馬

援將兵至臨沅

今武陵郡武陵縣即漢臨沅縣地

擊破之單程等飢困

乞降會援病卒謁者宗均為置吏以司之羣蠻遂平歷
章和安順四朝累反叛攻叅州郡討平之永和初武陵
太守上書以蠻夷卒服可比漢人增其租賦議者皆以
為可尚書令虞詡獨奏曰自古聖王不臣異俗非德不
能及威不能加其獸心貪婪難率以禮是故羈縻而綏
撫之附則受而不逆叛則棄而不追先帝舊典貢稅多
少所由來久矣今猥增之必有怨叛計其所得不償所
費帝不從其冬澧中淩中蠻

淩水出今澧陽
郡縣淩音婁

果爭布非

舊約遂殺鄉吏舉種反自後至桓靈二帝又累反叛攻
劫州郡討破之蜀先主章武初吳將李異屯巫梯歸今巴

東郡縣

先主遣將軍吳班攻破之於是武陵五溪蠻夷相

率響應

今黔中道謂之五溪

其後種落布在諸郡縣居武陵者為

五溪蠻而宜都天門巴東建平江北諸郡蠻所居皆深山重阻人跡罕至焉自晉劉石亂後諸蠻無所忌憚故其族漸得北遷陸渾以南滿於山谷宛洛蕭條略為邱墟矣魏道武泰常八年蠻王梅安率渠帥數千朝京師

求留質子以表忠款詔拜官褒慰之延興中太陽蠻首

桓誕

誕元子元誅誕亡入蠻中蠻推為主

擁河水以北潢葉以南八萬餘

落遣使內附孝文嘉之拜誕征南將軍荊州刺史襄陽

王後降為公其後蠻首田益宗雷婆思等俱率衆內屬

景明三年魯陽蠻伯鸞四年東荊州蠻樊素等反俱討

平之永寧初東荊州表太守桓叔興前後招慰太陽蠻

歸附者一萬七百日請置郡十六縣五十詔從之叔興

誕子也三年梁遣兵討江沔破掠諸蠻遣兵擊走之其

後累遣將圍廣陵楚城諸蠻並為前驅自汝水以南蠻
暴掠連年攻討散而復合其暴滋甚又有冉氏田氏向
氏者陬落尤盛餘則大者萬家小者千戶更相崇僭稱
王侯屯據三峽斷遏水路荆蜀行人至有假道者周文
略定伊瀍聲教南被諸蠻畏服武成初文州蠻及冉令
賢向五子等叛討平之隋置辰州以處蠻唐置錦州溪
州巫州叙州皆其地也唐季蠻酋分據其地自署刺史
晉天福中馬希範襲父業有湖南溪州刺史彭士愁等

以溪錦蔣州歸馬氏立銅柱為界宋建隆四年慕容延
釗平湖湘知溪州彭允林前溪州刺史田洪贊等列狀歸
順詔仍其官父死則以其子繼之太平興國二年梅山
洞蠻首領率衆寇劫商人詔遣使招諭猶寇暴不止乃
發潭州兵擊平之八年溪錦敘巫四州蠻相率詣辰州
願比內郡民輸租稅詔不許自後首領入貢不絕每加
賞賜存恤之最大者曰彭氏彭氏世有溪州州有三曰
上中下又有龍賜天賜忠順保靜感化永順州六懿安

遠新給富來寧南順高州十一總二十州皆置刺史而
以下溪州刺史兼都誓主十九州皆隸焉謂之誓下州
誓下州將承襲都誓主率蠻酋合議子孫若弟姪親黨
人當立者具州名移辰州州為保證申鈐轄司以聞迺
賜勅告印符受命者隔江北望拜謝州有押案副使及
校吏聽自補置彭氏自允殊文勇儒猛相繼為下溪州
刺史天禧中儒猛叛亡辰州發兵捕之執其子仕漢等
歸京師儒猛降授仕漢殿直處之西京後輒遁歸天聖

初以狀白辰州自言父老兄亡潛歸本道願放還家屬
詔徙其家京師舍以官第未幾儒猛言仕漢逃歸引羣
蠻為亂遣別子仕端等殺人朝廷嘉其忠降詔獎諭自
咸平以來始聽二十州納貢歲有賜蠻以為利有罪則
絕之熙寧初天子方用兵以威四夷湖北提刑趙鼎言
陝州洞酋刻剝無度蠻衆願內附屬辰州布衣張翹亦
上書言南北江利害遂以章惇察訪湖北經制蠻事北
江諸蠻隸辰州在黔之西南阻五溪漢黔中地為羈縻

州三十六而下溪州為大彭氏世居之南江諸蠻自辰
州達於長沙各有溪峒本唐郡縣五代失守諸酋分據
其地曰敘曰峽曰中勝曰元則舒氏居之曰蔣曰錦曰
懿曰晃則田氏居之曰富曰鶴曰保順曰天賜曰古則
向氏居之惇既經制於是南江之舒氏北江之彭氏梅
山之蘇氏誠州之楊氏相繼納土創立城寨使之比內
地為王民置沅誠二州元祐初傅堯俞等言置二州以
來設官屯兵費巨萬計公私騷然荆湖兩路為之空竭

乃廢誠州為渠陽軍而沅州至今為郡時朝廷方務休息痛懲邀功生事者廣西張整融州溫嵩坐擅殺蠻人皆寘之罪詔諭湖南北及廣西路曰國家疆理四海務在柔遠頃荆湖諸蠻近漢者無所統一因其請吏量置城邑以撫治之邊臣邀功獻議創融州道路侵逼洞穴致生疑懼朝廷知其無用旋即廢罷邊吏失於撫遏遂爾扇搖其叛酋楊晟臺等並免追討諸路所開道路創置堡寨並廢自後五溪郡縣棄而不問崇寧以來開邊

拓土之議復熾於是安化上三州及思廣洞蒙光明樂
安洞程大法都丹團黃光明靖州西道楊再立辰州覃
都管罵等各願納土輸貢賦又令廣西招納左右江四
百五十餘洞宣和中議者以為招致熟蕃接武請吏竭
金帛繒絮以啗其欲捐高爵厚俸以侈其心開辟荒蕪
草創城邑張皇事勢僥倖賞恩入版圖者存虛名充府
庫者亡實利不毛之地既不可耕狼子野心頑又莫革
建築之後西南夷獠交寇而溪洞之蠻亦復跳梁士卒

死於干戈官吏沒於王事生民肝腦塗地往往有之以
此知納土之議非徒亡益而又害之所由生也莫若俾
帥臣監司條具建築以來財用出入之數商較利病可
省者省可併者併減戍兵省漕運而夷狄可撫邊鄙可
無患矣乃詔悉廢所置州郡復祖宗之舊云崇寧初改
誠州為靖州紹興初監察御史明橐言溪洞歸明官應
湖南邊郡及二廣皆有之自崇觀以來員數寢多當時
務要優卹添差州郡指使及酒稅之類本不取其才任

及諸州措置隘寨關人把拓又令管押兵夫而所管押者皆鄉民也其歸明官生長溪峒初無愛民之意亦不習朝廷法令貪婪無厭鞭笞推辱無所赴愬議者欲令帥臣措置適宜既不致歸明官失所生怨亦無使遠民受害詔廣南荆湖路帥臣措置以聞隆興初右正言尹穡言湖南州縣地界與溪峒蠻徭連接以故省民與徭人交結往來擅易田產其間豪猾大姓規免稅役多以產寄徭人戶下內虧國賦外滋邊隙省地與徭人相連

舊有界至者宜詔湖南帥臣遣吏親詣其處明立封堠
自今不許省民將田產典賣與徭人及私以產業寄隱
若已前賣入徭戶難以遽行改追止令置籍如徭人願
退還省地田產者縣以官錢代還之仍委曲榜諭從之
嘉泰三年湖南安撫趙亮勵言湖南九郡皆與溪峒相
接其地濶遠南接二廣北連湖右其人狼子野心不能
長保其無事或因饑饉或因讐怨或因劫掠或至殺傷
州縣稍失隄防則不安巢穴越界生事為今日計莫若

先事選擇土豪為徭人所信服者為總首以任彈壓之責潛以馭之凡細微爭鬪止令總首彈壓開諭勸解自無浸淫之患蓋總首者語言嗜好皆與之同朝夕相接婚姻相通習知其利害審察其情偽而其力足以惠利之每遇饑歲則糴粟以賑其困乏徭人莫不感悅而聽從其言若先借補名目使得藉此以榮其身而見重於鄉曲彼必自愛惜而盡忠於公家如此則徭民之衆可坐以制之然亦須五年彈壓委有勞効然後正補以所

借之官所捐者虛名所得者實利安邊之策莫急於此
詔令本路諸司相度條具諸司言趙亮勵所言謂以蠻
徭治蠻徭其策莫良宜詔本路監司遵守從之嘉定初
柳州黑風峒徭人羅世傳出掠省地飛虎統制邊寧戰
沒遂為江西湖南之擾明年知隆興府趙希懌知潭州
史彌堅同共招降之二年李元礪羅孟二又率衆犯江
西攻破龍泉縣知隆興府王居安擒獲之七年臣僚言
夫熟戶山徭峒丁有田不許擅鬻頃畝多寡山畬濶狹

各有界至任其耕種但以丁名繫籍每丁量納課米三斗悉無其他科配熟戶山徭峒丁樂其有田之可耕生界有警極力為衛蓋欲保守田業也近年以來生界徭獠其沒省地而州縣無以禁戢者皆繇不能遵守良法有以致之夫溪峒之專條山徭峒丁田地不許與省民交易蓋慮其窮困而無所顧藉不為我用今州郡謾不加恩山徭峒丁有田者悉聽其與省民交易但利牙契所得而又省民得田輸稅在版籍常賦之外可以資郡

帑泛用而山徭峒丁之米掛籍自如催督嚴峻多不聊
生往往奔入生界溪峒受顧以贍口腹或為鄉導或為
徒伴引惹生界出沒省地駸駸不已為害甚大宜明敕
湖廣監司行下諸郡凡屬溪峒山徭峒丁田業不得擅
與省民交易犯者以違制論仍歸其田庶山徭峒丁有
田可耕不致妄生邊釁實綏靖遠民之良策從之

石湖范氏桂海虞衡志徭本盤瓠之後其地山溪高
深介於巴蜀湖廣間綿亘數千里椎髻跣足衣斑斕

布褐名為徭而實不供征役各自以遠近為伍以木
葉覆屋種禾黍粟豆山芋雜以為糧截竹筒而炊暇
則獵食山獸以續食嶺蹙險阨負戴者悉着背上繩
繫於額俛而趨俗喜讐殺猜忍輕死又能忍饑行鬪
左腰長刀右負大弩手長鎗上下山險若飛兒始能
行燒鐵石烙其跟蹠使頑木不仁故能履棘茨根枿
而不傷兒始生秤之以鐵如其重漬之毒水兒長大
煨其鋼以製刀終身用之試刀必斬牛仰刃牛項下

以肩負刀一負即殊者良刀也弩名偏架弩隨跳躍
中以一足蹶張背手傳矢往往命中鎗名掉鎗長二
丈餘徒以護弩不恃以取勝戰則一弩一鎗相將而
前執鎗者前却不常以衛弩執弩者口銜刀而手射
人敵或冒刃逼之鎗無所施弩人釋弩取口中刀奮
擊以救度險整其行列退去必有伏弩土軍弓手輩
與之角技藝爭地利往往不能決勝也歲首祭盤瓠
雜揉魚肉酒飯於木槽扣槽羣號為禮十月朔日各

以聚落祭都貝大王男女各成列連袂相攜而舞謂之踏徭意相得則男咿鳴躍之女羣負所愛去遂為夫婦不由父母其無配者俟來歲再會女三年無所向父母或欲殺之以其為人所棄云樂有盧沙銃鼓胡盧笙竹笛之屬其合樂時衆音競闕擊竹筒以為節團樂跳躍叫咏以相之歲暮羣操樂入省地州縣扣人門乞錢米酒炙如儺然徭之屬桂林者興安靈川臨桂義寧古縣諸邑皆迫近山徭最強者曰羅曼

徭麻園徭其餘如黃沙甲石嶺屯褒江贈腳黃村赤
水藍思巾江竦江定花冷石白面黃意大利小平灘
頭丹江閃江等徭不可勝數山谷間稻田無幾天少
雨種不收無所得食則四出犯省地求斗升以免
死久乃玩狎雖豐歲猶剽掠沿邊省民與徭犬牙者
風聲氣習及筋力技藝略相當或與通婚姻結怨仇
往往為徭鄉導而分鹵獲徭既自識徑路遂數數侵
軼邊民遂不能誰何攻害田廬剽穀粟牛畜無歲無

之踉蹌篁竹飄忽往來州縣覺知則已趨入巢穴官軍不可入但分屯路口山多蹊不可以徧防加久成勞費又徭人常以山貨沙板滑石之屬竊與省民博鹽米山田易旱乾若一切閉截無所得食且冒死突出為毒滋烈沿邊省民因與交關或侵負之與締仇怨則又私出相讐殺余既得其所以然乾道九年夏遣吏經理之悉罷官軍專用邊民籍其可用者七千餘人分為五十團立之長副階級相制毋得與徭通

為之器械教習使可捍小寇不待報官徭犯一團諸
團鳴鼓應之次告諭近徭亦視省民相團結毋得犯
法則通其博易之路不然絕之彼見邊民已結形格
勢禁不可輕犯幸得通博買有鹽米之利皆驩然聽
命最後擇勇敢吏將桑江歸順五十二徭頭首深入
生徑羅曼等洞尤狠戾素不賓化者亦以近徭利害
諭之悉從乃為置博易場二一在義寧一在融州之
榮溪天子誕節首領得赴屬縣與犒宴諸徭大悅伍

籍遂定保郭隱然萬一遠徭弗率必須先破近徭近徭欲動亦須先勝邊團始能越至城郭然亦難矣既數月諸徭團長袁臺等數十人詣經略司謁謝悉紫袍巾裹橫槌犒以銀盃綵絕鹽酒勞遣之又各以誓狀來其略云某等既充山職今當鈐束男姪男行持棒女行把麻任從出入不得生事者上有太陽下有地宿其翻背者生兒成驢生女成猪舉家滅絕不得翻面說好背面說惡不得偷寒送煖上山同路下水

同船男兒帶刀同一邊一點一齊同殺盜賊不用此
款者並依山例山例者誅殺也蠻語鄙陋不欲沒其
實略志於此余承乏帥事二年諸徭無一跡及省地
遂具以條約上聞詔許遵守行之

廩君種

廩君種不知何代初巴氏樊氏暉

音審

氏相氏鄭氏五姓

皆出於武落鍾離山

在今夷陵
即巴山縣

其上有赤黑二穴巴氏

之子生於赤穴四姓之子皆生黑穴未有君長共立巴

氏子務相是為廩君從夷水下至鹽陽

按今夷陵郡巴山縣清江水一

名夷水一名鹽水其源出清江縣西都亭山

廩君於是君乎夷城四姓皆臣

之巴梁間諸巴皆是也

即巴漢之地按范曄後漢史云四姓之子未有君長俱事鬼神

乃共擲劍於石穴約能中者奉以為君務相乃獨中之又令各乘土船約能浮者當以為君餘姓悉沉惟務相獨浮因共立之是為廩君乃乘土船從夷水下鹽陽鹽水有神女謂廩君曰此地廣大魚鹽所出願留共居廩君不許鹽神暮輒來宿詰朝即化為蟲與諸蟲羣飛掩蔽日光天地晦冥積十餘日廩君伺其便因射殺之天乃開明廩君於是居於夷城四姓皆臣之廩君死魂魄化為白虎巴氏以虎飲人血故以人祠焉是皆怪誕以此不戰國時秦惠王并巴中以巴氏為蠻夷君長其人

歲出賦二千一十六錢三歲一出義賦千八百錢其人

戶出帑布八丈二尺雞羽三十鏃

說文曰帑布南蠻夷布也帑音公亞反

毛詩四鏃既均儀禮鏃矢一乘鄭元曰鏃猶侯也侯物而射之三十鏃百二十也鏃音侯

漢興南郡

太守靳强奏請一依秦時故事至光武建武二十三年

南郡奏湓山蠻雷遷等始反叛

屠音

武威將軍劉尚討

破之徙其種人七千餘口置江夏界中其後沔中蠻是

也

漢之江夏郡今竟陵富水安陸齊安漢陽江夏蘄春郡地是也

和帝永元十三年巫

蠻許聖等

漢之巫縣今雲安郡巫山縣也

以郡收稅不均反叛發荊州

諸郡兵

今江陵夷陵澧陽武陵長沙衡陽等郡地也

討破之復悉徙置江夏

靈帝光和三年江夏蠻復反寇患累年廬江太守陸康

討破之

漢廬江即今郡地

漢末張魯居漢中以鬼道教百姓實

人敬信巫覡多往奉之值天下大亂自巴西之宕渠遷

於漢中楊車坂抄掠行旅百姓患之號為楊車巴魏武克

漢中李特之祖將五百餘家歸之拜為將軍遷於略陽

北土號之為巴氏特父慕為東羌獵將特少仕州縣見

異當時雄武沉毅有大度元康中氏齊萬年反關中擾

亂頻歲大饑百姓流移就食相與入漢川者數萬特隨
流入入蜀聚巴西勇壯為寇盜遂據梁益傳其弟流子
雄僭即帝位傳班期壽勢六世而亡

板楯蠻

板楯蠻秦昭襄王時有一白虎於蜀巴漢之境傷害千
餘人昭王乃募有能殺虎者賞邑萬家時有巴郡閬中
夷今閬中
郡縣廖仲等射殺白虎昭王以其夷人不欲加封

乃刻石盟要復夷人頃田不租十妻不算

一戶免其一
頃田之租稅

雖有十妻不輸口算之錢

傷人者論殺人得以賍錢贖死

何承天纂文曰賍蠻

夷贖罪貨也賍徒濫反

盟曰秦犯夷輸黃龍二隻夷犯秦輸清酒

一鍾夷人安之至漢高帝為漢王發夷人還三秦

今關中秦

也川秦地既定乃遣還巴中復其渠帥羅朴督鄂度夕龔

七姓不輸租賦餘戶乃歲入口錢四十巴人呼賦為賓

謂之賓人焉代號為板楯蠻夷間中有渝水其人多居

水左右天性勁勇初為漢前鋒數陷陣俗喜歌舞高帝

命樂人習之所謂巴渝舞也遂代代服從至後漢以後

郡守常率以征伐靈帝光和三年巴郡板楯蠻叛

今通川

山南平涪陵南川清化雲安始寧巴川南賓南浦閬中南充安岳盛山等郡地則巴川之地是也 寇掠

三蜀及漢中諸郡

即漢川諸郡今漢中安康洋川房陵郡地皆是也

靈帝乃問

益州計吏考以征伐方略漢中計吏程苞對曰板楯七姓

以射殺白虎立功先代復為羌人其人勇猛善戰昔安

帝永初中羌入漢川郡縣破壞得板楯救之羌死敗殆

盡故號為神兵至桓帝建和二年羌復大入實賴板楯

連摧破之前車騎將軍馮緄南征武陵

緄本反

亦倚板楯

以成其功近益州郡縣亂

今漢川蜀川郡縣地

太守李顯之亦以

板楯討而平之忠功如此本無惡心但長吏鄉亭更賦

至重僕役箠楚過於奴虜闕庭悠遠不能自聞含怨呼

天叩心窮谷故邑落相聚以致叛戾非有謀主僭號以

圖不軌今但遣明能牧守自然安集不煩征伐也帝從

其言遣太守曹謙宣詔赦之即皆降服及漢末天下亂

自巴西之宕渠

今符陽郡

遷於漢中楊車坂抄掠行旅號為

楊車巴魏武克漢中李特之祖將五百家歸魏武又遷

於略陽北復號之為巴氏

略陽今天水郡龍城縣

蜀後主劉禪建

興十一年涪陵屬國人夷反

今涪陵郡地

車騎將軍鄧芝往

討皆破平之其沔中蠻至晉時劉石亂後漸得北遷陸

渾以南滿於山谷宋時荊州置南蠻校尉

今江陵郡巴東夷陵雲安

等郡地雍州置寧蠻校尉以領之

今襄陽南陽郡地

如蠻人順附

者一戶輸穀數斛其餘無事宋人賦役嚴苦貧者不復

堪命多逃亡入蠻蠻無徭役強者又不供官稅結黨連

群動有數百千人州郡力弱則起為盜賊種類稍多戶

口不可知也文帝元嘉中天門

今澧陽郡地

淩中令宋矯之

徭賦過重蠻不堪命蠻田向求等為寇破淩中虜掠百

姓及劉道產善撫諸蠻前後不附官者莫不順服皆引

出平土多緣沔為居道產亡後蠻又反叛孝武帝出為

雍州時巴東

今巴東

建平

今巴東

宜都

今夷陵郡

天門四郡蠻為

寇諸郡人戶流散百不存一孝武即位後大明中西陽

夷

今夷陽郡

皆反叛沈慶之率江雍荆河州諸軍討破之

今江

潯陽鄱陽章郡臨川廬陵等郡地
雍已具上荆河今廬江同安郡也

明帝順帝時尤甚雖

遣攻討終不能禁荊州為之虛弊齊高帝時武陵西溪

蠻田思飄武帝永明初黔陽蠻田豆渠

武陵黔陽皆今五溪中也湘

川蠻陳雙李答並寇掠州郡討平之

湘川今長沙衡陽也

其後雍

司州蠻

司州今義陽弋陽郡

與後魏通助荒人桓天生侵害齊境

六年除田駟路為試守北遂安左郡太守田驢王為試

守宜人左郡太守田何代為試守新平左郡太守皆郢

州蠻帥

並漢沔間蠻也其左郡亦茲地焉郢州今江夏漢陽郡

後魏孝文太和中

襄陽蠻酋雷婆思率戶千餘內徙求居太和川詔給廩

食後開南陽全有沔北之地今武當南陽漢東等郡蠻人安堵不

為寇賊宣武帝景明初大陽蠻酋田育邱等共二萬八

千戶叛齊附魏詔置四郡十八縣魯陽蠻今臨汝郡魯山縣也魯

伯鸞等聚衆萬餘攻逼潁陽詔遣左衛將軍李崇討平

之斬級數千徙萬餘家於河北諸州及六鎮尋叛南走

六鎮今單于府馬邑郡界也所在追討比及於河殺之皆盡梁武帝

遣兵沿沔破掠諸蠻又遣蔡令孫等三將步騎五千侵

南荆之西沿漢上下今襄陽郡之上破略諸蠻後魏遣

武當郡以東地

蠻帥桓叔率蠻夏二萬餘人擊之斬令孫等俘虜二千

餘人其後因六鎮秦

今天水郡地

隴

今汧陽郡地

所在反叛荆

今南

陽淮安郡地

郢

今汝南義陽郡

蠻大擾動斷三鵞路

今南陽郡向城縣北至臨汝郡

至於襄城

今臨汝郡縣

汝水處處鈔劫百姓多被其害自後

魏與宋齊梁之時淮汝江漢間諸蠻渠帥互有所屬皆

授封爵焉及魏末為暴滋甚有冉氏向氏田氏者陬落

尤盛大者萬家小者千戶更相崇樹僭稱王侯屯據三

峽斷遏水路荆蜀行人至有假道者西魏文帝大統十

一年沔漢諸蠻擾動大將軍楊忠擊破之其唐州蠻田

魯嘉亦叛

唐州今淮安郡

自號荊河州伯遣王雄討之後周明

帝時蠻帥冉令賢向五子王等反攻陷白帝

今雲安郡

武帝

天和初詔開府陸騰討斬之蠻衆大潰斬首萬餘級騰

乃積其骸骨於水邏城側為京觀後蠻蜚見者輒大號

哭自此狼戾之心輟矣信州舊理白帝騰更於蜀先主

故城南八陣之北臨江岸築城移置信州又以巫縣信

陵秭歸

今雲安巴東二郡界

並是峽中要險於是築城置防以為

襟帶焉

按後漢史其在黔中五溪長沙間則為盤瓠之後其在峽中巴梁間則為廩君之後種落繁盛

侵擾州郡或移徙交雜亦不可得詳別焉

通典言按後漢史其在黔中五溪長沙間者則為盤瓠之種其在峽中巴梁間者則為廩君之後其後種落繁盛侵擾州郡或移徙交錯不可得而詳別今按通典所叙板楯蠻魏晉以後之事南史謂之荆揚蠻北史謂之蠻獠而俱以為其源出自盤瓠不言板楯然六朝時蠻漸徙而之北則亦無由

究其源流宗派矣姑兩存之

南平蠻

南平蠻東距智州南屬渝州西接南州北涪州戶四千餘多瘴癘山有毒草沙虱蝮蛇人樓居梯而上名為干欄婦人橫布二幅穿中貫其首號曰通繆美髮髻垂於後竹筒三寸斜穿其耳貴者飾以珠璫俗女多男少婦人任役婚法女先以貨求男貧者無以嫁則賣為婢男子左衽露髮徒跣其王姓朱氏號劒荔王唐貞觀三年

遣使內款以其地隸渝州又有甯氏世為南平渠帥陳
末以其帥猛力為寧越太守陳亡自以為與陳叔寶同
日而生當代為天子乃不入朝隋兵阻瘴不能進猛力
死子長真襲刺史及討林邑長真出兵攻其後又率部
落從征遼東煬帝授官遣還又以其族人甯宣為合浦
太守隋亂皆以其地附蕭銑武德初以寧越鬱林之地
降自是交愛諸州始通長真死子據襲刺史其地西南
接烏蠻昆明哥蠻大小播州部族數十居之宋治平中

熟夷李光吉梁秀等三族據其地各有衆數千家間以威勢誘脅漢戶有不從者屠之沒入土田往往投充客戶謂之納身稅賦皆里胥代償藏匿亡命數以其徒偽為生獠劫邊民官軍追捕輒遯去習以為常密賂黠民覘守令動靜稍築城堡繕器甲遠近患之熙寧三年轉運使孫固判官張詵使兵馬使馮儀葉簡杜安行圖之以禍福開諭因進兵復賓化寨平蕩三族以其地賦民凡得租三萬五百石絲綿一萬六千兩以賓化寨為隆

化縣隸涪州建榮懿扶歡兩寨其外銅佛堪者隸渝州
南州縣地皆膏腴自先吉等平他部族據有之朝廷因
補其土人王才進充巡檢委之控扼才進死部族無所
統數出盜邊朝廷命熊本討平之建堪為南平軍以渝
州南州涪州隆化隸焉元豐四年有楊光震者助官軍
破乞弟殺其黨阿訛大觀二年木攀首領趙秦播州夷
族楊光榮各以地內屬詔建溱播二州後皆廢

東謝

東謝渠帥姓謝氏南蠻別種在黔中之東地方千里其俗無文字刻木為約巢居刀劍不離其身冠熊皮被猛獸革酋長名元深代襲其一族不育女自云高姓不可下嫁唐貞觀三年元深入朝冠烏熊皮冠若今之旄頭以金絡額身披毛帔韋皮行膝而著履貞觀中開其地為應州隸黔州都督府

今黔中郡所管羈縻州

西趙

西趙蠻在東謝之南並南蠻別種其界東至夷子西至

郡縣之外羈縻州洞雖故皆蠻地猶近省民供稅役故不以蠻命之過羈縻則謂之化外真蠻矣區落連亘湖廣接於西戎種類殊詭不可勝計此等前世蓋嘗內附建黔南帥府於融州以統之今融帥已罷一切化外也融在徭洞之南蕃蠻之東蕃蠻時出州縣城郭以蜜臘草香等貿易每歲聖節亦有出赴燕設者其稱大小張大小王龍石騰謝等謂之西南蕃地與牂牁接人椎髻跣足或着木履衣青花斑布以射

獵讐殺為事持木牌標槍木弩藥箭相鈔掠而戎州以西又有羅坐夜回計利流求萬壽多嶺阿悞等蠻謂之蠻酋酋自謂太保大抵與山獠相似但有首領耳其人椎髻以白紙繫之云尚與諸葛武侯制服也西南蕃俗大抵介別男夫甚剛妻女甚潔夫婦異居妻所居深藏不見人夫過其妻掛劍於門而後入或期於深山不褻穢其居謂否則鬼神禍之此諸蠻皆未嘗為害故其事亦不能詳知又有漢蠻者十年前

大理馬至橫山此蠻亦附以來衣服與中國略同能
通華言自云本諸葛武侯戍兵聞其種人絕少按三
國志初無留戍事唐史有西屠夷乃馬伏波兵留不
去者初止十戶隋末至三百戶皆姓馬號馬留人與
林邑分唐境疑漢蠻即此類其南連邕州南江之外
稍有名稱者羅殿自杞以國名羅孔特磨白衣九道
等以道名此皆成聚落地皆近南詔羅在融宜之西
邕之西北唐會昌中封其帥為羅殿王世襲爵歲以

馬至橫山互市亦有移至邕稱守羅國王羅呂押馬者稱西南謝蕃知武州節度使都大照會羅殿國文字按唐史東謝蠻居黔州西謝氏世酋長部落尊畏之然則謝蕃蓋羅殿之巨室又知其地近牂牁自杞本小蠻尤兇狡嗜利其賣馬於橫山少拂意即拔刃向人亦嘗有所殺傷邕管亦殺數蠻以相當事乃已今其國王曰阿已生三歲而立其臣阿謝柄國善撫其衆諸蠻比多附之至有精騎萬計阿已年十七阿

謝乃歸國政阿已猶舉國以聽之諸蠻之至邕管賣
馬者風聲氣習大抵略同其人多深目長身黑面白
牙以錦纏椎髻短褐徒跣戴笠荷瑣珎刷牙金環約
臂背長刀腰弩箭箠腋下佩皮篋胷至腰駢束麻索
以便乘馬取馬於羣但持長繩走前擲馬首絡之一
投必中刀長三尺甚利出自大理者尤奇性好潔數
人共飯一柶中植一匕置杯水其傍少長共匕而食
探匕於水抄飯一哺許搏之柶令圓淨始加之匕上

躍以入口蓋不欲汚匕妨他人每飯極少飲酒亦止
一杯數嚥始能盡蓋腰腹束於繩故也食鹽礬胡椒
不食彘肉食已必刷齒故常皓然甚惡穢氣野次有
穢必坎而覆之邕人每以此制其忿戾投以穢器輒
躍馬驚走

獠

獠蓋蠻之別種往代初出自梁益之間自漢中達於邛
笮川谷之間所在皆有

北自漢中西南及越嵩以
來皆有之笮才各反

俗不辯

姓氏又無名字所生男女長幼次第呼之其丈夫稱阿
謩阿段婦人阿夷阿等之類皆其語之次第稱謂也依
樹積木以居其上名曰干欄干欄大小隨其家之口數
往往推一酋帥為主亦不能遠相統攝父死則子繼若
中國之黨族也獠王各有鼓角一雙使其子弟自吹擊
之好殺害多仇怨不敢遠行性同禽獸至於忿怒父子
不相避惟手有兵刃者先殺之若殺其父走避於外求
得一狗以謝其母然後敢歸母得狗謝不復嫌恨若報

口寬腹名曰銅爨既薄且輕易於熟食蜀本無獠晉李

勢時諸獠始出巴西渠川廣漢陽安資中犍為梓潼

今蜀

川之內布在山谷十餘萬落攻破郡縣為益州大患自桓

溫破蜀之後力不能制又蜀人東流山險之地多空獠

遂挾山傍谷與人參居參居者頗輸租賦在深山者乃

為匪人至梁武帝梁益二州

今漢川蜀川郡縣也

歲歲伐獠以自

裨潤公私頗藉為利後魏宣武帝正始初將夏侯道遷

舉漢中附魏宣武帝遣尚書邢巒為梁益二州刺史以

鎮之其後以梁益二州控攝嶮遠乃立巴州

在今清化郡以

統諸獠後以巴酋帥嚴始欣為刺史又立隆城鎮隆鎮

所綰獠二十萬戶所謂北獠也歲輸租布魏明帝孝昌

初據城叛入梁益二州並遣將討之攻陷巴州執始欣

斬之後梁州為梁氏所陷

今漢中郡

自此又屬梁矣後周武

帝平梁

達奚武平之

益

尉遲迥平之

令所在撫慰其與華人雜居

者亦頗從賦役然天性暴亂旋致擾動每歲命隨近州

鎮出兵討之獲其生口以充賤隸謂之壓獠焉復有商

旅往來者亦資以為貨公卿逮於人庶之家有獠口者多矣其種類滋蔓保據巖壑依林走險若履平地性又無知殆同禽獸諸夷之中最難以道義招懷也劔南諸獠唐武德貞觀間數寇州縣者不一巴州山獠王為馨叛梁州都督龐玉梟其首又破餘黨符陽白石二縣獠其後眉州獠反益州行臺郭行方大破之未幾又破洪雅二州獠俘男女五千口是歲益州獠亦反都督竇軌請擊之太宗報曰獠依山險當拊以恩信脅人以兵威

豈為人父母意邪貞觀七年東西玉洞獠反以右屯衛大將軍張士貴為龔州道行軍總管討平之十二年巫州獠叛夔州都督齊善行擊破之俘男女三千餘口鈞州獠叛桂州都督張寶德討平之明州山獠又叛交州都督李道彥擊走之是歲巴洋集壁四州山獠叛攻巴州遣右武侯將軍上官懷仁破之於壁州虜男女萬餘明年遂平十四年羅竇諸獠叛以廣州都督黨仁弘為竇州道行軍總管擊之虜男女七千餘人太宗再伐高

麗為船劔南諸獠皆半役雅邛眉三州獠不堪其擾相率叛詔發隴右峽兵二萬以茂州都督張士貴為雅州道行軍總管與右衛將軍梁建方平之高宗初琰州獠叛梓州都督謝萬歲充州刺史謝法興黔州都督李孟嘗討之萬歲法興入洞招慰遇害顯慶二年羅竇生獠酋領多胡桑率衆內附上元末納州獠叛寇故茂都掌二縣殺吏民焚解舍詔黔州都督發兵擊之大歷二年桂州山獠叛陷州刺史李良遁去貞元中嘉州綏山縣

婆籠川生獠首領甫枳兄弟誘生蠻為亂剽居人西川
節度使韋臯斬獠招其首領勇于等出降或請增柵東
陵界以守臯不從曰無戎而城害所生也獠亦自是不
擾境戎瀘間有葛獠居依山俗林箐踰數百里俗喜叛
州縣撫視不至必合黨數千人持排而戰奉酋帥為王
號曰婆能出入前後植旗大中末昌瀘二州刺史貪沓
以弱繒及羊彊獠市米麥一斛得直不及半羣獠訴曰
當為賊取死耳刺史召二吏榜之曰皆爾屬為之非吾

過獠相視大笑遂叛立酋長始艾為王踰梓潼所過焚
剽刺史劉成師誘降其黨斬首領七十餘人餘衆遁至
東川節度使柳仲郢諭降之始艾稽首謝罪仲郢賞遣
之

石湖范氏桂海虞衡志曰獠依山林而居無酋長版
籍蠻之荒忽無常者也以射生食動為活蟲豸能蠕
動者皆取食無年甲姓名一村中推有事力者曰郎
火餘但稱火歲首以土杯十二貯水隨辰位布列郎

火禱焉乃集衆往觀若寅有水而卯涸則知正月雨
二月旱自以不差諸蕃歲賣馬於官道其境必取
貨及鹽牛否則梗馬路官亦以鹽綵和謝之其稍稍
漸有名稱曰上下者則入蠻類舊傳獠有飛頭鑿齒
鼻飲白衫花面赤視之屬二十一種今右江西南一
帶甚多殆百餘種唐房千里異物志言獠婦生子即
出夫憊卧如乳婦不謹則病其妻乃無苦唐志言飛
頭獠者頭欲飛周項有痕如縷妻子共守之及夜如

病頭忽亡比旦還又有烏武獠地多瘴毒中者不能
飲藥故自鑿齒

文獻通考卷三百二十八

欽定四庫全書

文獻通考卷三百二十九

鄱陽馬端臨貴與著

四裔考六

夜郎國

夜郎國

今夜郎播川犍為郎即其國

漢時西南夷君長以十數夜郎

最大在蜀郡徼外東接交趾西鄰滇國

今雲南郡滇國

其國鄰

牂牁江江廣數里出番禺城下

戰國時楚頃襄王遣將莊蹻從沅水伐夜郎軍

至且蘭椽船於岸而步戰既滅夜郎因留王滇池以且
蘭有椽船牂牁處乃改其名為牂牁牁繫船棧也番

禺即今南海郡城南江棧音戈其地多雨潦俗好巫鬼禁忌寡畜產又無

蠶桑故最貧鉤町有桄榔木可以為麴百姓資之

鉤町漢以

為縣屬牂牁郡鉤音武帝時唐蒙上書曰竊聞夜郎精

鉤于反町音大

禺反

兵可得十餘萬浮船牁江出不意此制南越奇兵也
乃拜蒙為郎中遂見夜郎侯蒙厚賜諭以威德夜郎貪

漢繒帛以為漢道險終不能有也乃與蒙約還報乃以

為犍為郡

今犍為陽安仁壽通義和義資陽皆其地

發巴

巴郡今通川等十五郡地已具上注

蜀卒

蜀郡今蜀郡濛陽唐安臨邛廬山等郡亦曰蜀川

理道自犍道指牂牁江

蜀人司馬相如亦言西夷邛笮可置郡

今越巂郡地

帝使相

如往諭皆如南夷為置一都尉十餘縣屬蜀郡當是時

巴蜀四郡

漢中廣漢巴郡今漢川巴川蜀川地也

通西南夷道戍轉相餼

古餉字

數歲道不通士罷餓離濕

罷音疲離遭也

死者甚衆夷又

數反發兵興擊耗費無功帝患之使公孫弘往視問焉

還言其不便時方築朔方據河逐胡弘因數言西南夷

為害

通西南夷大為損害

可且罷專力事匈奴上罷西夷獨置南

夷兩縣一都尉及元狩元年張騫言使大夏時見蜀布

邛竹杖問所從來曰從東南身毒國

即天竺也

可數千里得

蜀賈人市或聞邛西可二千里有身毒國於是乃令王

然于間出西南夷往身毒國至滇道皆為昆明所閉

昆明

在今越巂郡西南

莫能通身毒及南越反上使發南夷兵且蘭

君小邑乃與其衆反漢發巴蜀校尉擊破之遂平南夷

為牂牁郡

今涪川夜郎義泉郡地

夜郎侯始倚南越滅恐懼遂

入朝封為夜郎王昭帝始元中牂牁談指同並等二十

四邑凡三萬餘人皆反

並音伴談指同並後皆為縣屬漢牂牁郡

遣水衡都

尉發蜀郡犍為兵擊牂牁大破之後姑繒葉榆人復反

鉤町侯亡波率其人擊之有功漢立亡波為鉤町王至

成帝河平中夜郎王興與鉤町王禹漏卧侯俞

漏卧夷邑名後

為縣屬漢牂牁

更舉兵相攻牂牁太守請發兵誅興等漢以道

遠不可擊遣大中大夫張匡持節和解並不從杜欽說

王鳳曰張匡和解蠻夷王侯王侯不從不憚國威其效

可見恐議者選更復守和解

選更怯懦不前之意選息寃反更人寃反

太守

察動靜有變廼以聞如此則復曠一時

曠空也一時三月言空廢一時

不早發兵

王侯得收獵其衆申固其謀黨助衆多各不勝忿

必相殄滅自知罪成狂犯守尉

言起狂悖之心而殺守尉

遠藏溫暑

毒草之地雖有孫吳之將賁育之士若入水火往必焦

沒智勇俱亡所設施屯田備守之費不可勝量宜因其

罪惡未成未疑國家加誅陰勅旁郡守尉練士馬大司

農先調穀積要害處

調發也要害者在
我為要於敵為害

選任職太守往

以秋涼時入誅其王侯尤不軌者即以為不毛之地亡

用之人聖王不以勞中國

即猶若也不毛言不生草木

宜罷郡放棄

其人絕其王侯勿復通如以先帝所立累代之功不可隳壞亦宜因其萌芽早斷絕之及已成形然後師興則萬姓被害矣鳳於是薦陳立為牂牁太守至牂牁廼從吏數十人出行縣召興興將數千人往立數責因斷興頭出曉其衆皆釋兵降興子邪務收餘兵迫脅旁二十邑反立又擊平之公孫述時大姓龍傳尹董氏與郡功曹謝暹保境為漢乃遣使從番禺江奉貢

番禺江今南海郡

光

武嘉之並加褒賞桓帝時郡人尹珍乃從汝南許慎應奉受經書學成還鄉里教授自是南域始有學焉珍官

至荊州刺史

後漢史云有女子浣於避水有三節大竹流入足間剖之得一男兒養之及長自立

為夜郎侯以竹為姓武帝元鼎中置牂牁郡夜郎侯迎降天子賜其王印綬後遂殺之夷獠咸以竹王非血氣所生甚重之求為立後牂牁太守吳霸以聞天子乃封其三子為侯死配食其父按范曄所撰乃引華陽國志又按漢書其夜郎侯降封王不言殺成帝時猶謂之夜郎王曄焉得云竹王被殺後封其子為侯與班史全乖角宜華陽國志為怪說也大抵范曄著述多稱詭異若無他書可以辯正則因習纂錄不復刊革云

唐置費珍莊琰播郎牂夷等州其地北距充州百五十

里東距辰州二千四百里南距交州一千五百里西距
昆明九百里無城郭散居村落土多霖雨稻粟皆再熟
無徭役將征戰乃屯聚刻木為契其法刼盜者償其主
三倍殺人者出牛馬三十頭與其家以贖死疾病無醫
藥但擊銅砂羅以祀神風俗與東謝蠻同隋大業末首
領謝龍羽據其地勝兵數萬人唐末王建據西川由是
不通中國後唐天成二年牂牁清州刺史宋朝化等一
百五十人來朝孟知祥據蜀復不通朝貢宋乾德三年

平蜀五年知西南蕃南寧州蕃落使龍亮瑄等來貢詔授以官開寶二年武才等一百四十人來貢八年三十九部順化王子若廢等三百七十人來貢馬百六十匹丹砂千兩太平興國五年蕃王龍瓊琚遣其子并諸州蠻七百四十七人以方物名馬來貢自是至景德朝貢不絕太宗召見其使詢以地理風俗譯對曰地去宜州陸行四十五日土宜五穀多種杭稻以木弩射麋鹿充食每三二百戶為一州州有長殺人者不償死出家以

贖國王居有城郭無壁壘官府惟短垣光進說與前書
所記小異故并叙之上因令作本國歌舞一人吹瓢笙
如蚊蚋聲良久數十輩連袂宛轉而舞以足頓地為節
詢其曲則名曰水曲其使十數輩從者千餘人皆蓬髮
面目黧黑狀如猿猴使者衣虎皮氍毹以虎尾插首為
飾大中祥符以後頗為寇抄轉運使寇瑊調兵擊之夷
人寧息天聖以來訖於元符貢奉其首領龍氏於諸姓
為最大世世襲職貢奉尤頻使者但衣布袍至假伶人

之衣入見蓋實貧陋所冀者恩賞而已賜以袍帶等物
至刺其數於臂故事蠻夷入貢雖交趾于閩之屬皆御
前殿見之獨此諸蕃見於後殿蓋卑之也諸蕃部族數
十獨龍方張石羅五姓最著號五姓蠻其後又有程氏
韋氏皆比附五姓故號西南七番云

滇

滇者漢時在夜郎之西靡莫之屬滇最大

靡莫西南徼外蠻也滇音

顛

始楚頃襄王使將軍莊蹻

蹻即莊王之苗裔居畧反

將兵循江上

畧巴黔以西

巴國今清化始寧咸安符陽巴川南賓南浦是其地也黔則黔中

躋至滇

池方三百里

在今雲南郡其澤在西北水源深廣末更淺狹如倒流故曰滇池

旁平地

肥饒數千里

池旁之地

以兵威定屬楚欲歸報會秦擊楚巴

黔中郡道塞不通因而以其衆王滇變服從其俗以長

之

為其長帥也秦史記及漢書皆云楚威王使莊躋畧巴黔以西至滇池欲歸會秦奪楚巴黔中郡因以其

衆王滇後十餘歲秦滅之又秦楚自威王後懷王立三十年至頃襄王之二十二年秦昭襄王遣兵攻楚取巫黔中郡地後漢史則云頃襄王時莊豪王滇豪即躋也若莊躋自威王時將兵畧地屬秦陷巫黔中郡道塞不還凡經五十二年豈得如此淹久或恐史記謬誤班生因習便書范曄所記詳考為正又案莊躋王滇後十五

年頃襄王卒考烈王立二十五年幽王立十年王負芻立五年而楚滅十五年而秦亡七十年何故云躋之王滇後十餘歲而秦亡斯又未之詳也至武帝時滇王有衆數萬人元封二

年發巴蜀兵臨滇滇王舉國降請置吏入朝於是以為

益州郡

今雲南郡

賜滇王王印長復其人

武帝割牂牁越雋各數縣配之後數

年復并昆明地皆以屬之

西南夷君長以百數獨夜郎滇受王印滇

小邑也最寵焉後王莽篡位改漢制貶鉤町王為侯蠻

夷盡反莽遣平蠻將軍馮茂發巴蜀犍為吏士賦取足

於人以擊益州出入三年疾疫死者什七巴蜀騷動更

遣寧始將軍廉丹大發天水隴西騎士廣漢蜀犍為吏人十萬轉輸者合二十萬人擊之不能剋而還公孫述據益土文齊為太守亦固守拒述後漢初遣使朝謁建武十八年夷渠帥棟蠡與姑復葉榆桺棟連然滇池建

伶昆明諸種反叛殺長吏

漢姑復縣屬越嵩郡餘六縣並屬益州郡也並在今越嵩

雲南郡也

遣武威將軍劉尚等發廣漢犍為蜀人及朱提夷

擊之尚軍遂渡瀘水入益州郡界

瀘水一名若水旄牛徼外經朱提至犍道

入江在今越嵩郡南時有瘴氣

羣夷聞大兵至皆棄壘奔走尚獲其羸

弱穀畜斬棟蠶帥凡首虜萬餘人諸夷悉平至蜀後主

建興二年諸葛孔明率衆南征四郡平之改益州郡為

建寧分建寧永昌

今雲南郡也

為雲南郡又分建寧牂牁為

興古郡

亮至南中所戰皆捷孟獲者為夷漢所服募生

曰不知虛實故敗定易勝耳亮縱使更戰七縱七擒而
亮猶遣獲獲止不去曰公天威也南人不復反矣遂至滇
池南中平皆即其渠率而用之或以諫亮亮曰若留外
人即留兵兵留即無食一不易也夷新傷破父兄死喪
留外人而無兵者必成禍患二不易也又夷累有廢殺
之罪自嫌釁重若留外人終不相信三不易也今欲使
汝不留兵不運糧而綱
紀遂定夷漢相安故爾

邛都

邛都漢時自滇以北君長十數邛都最大

今越嵩郡本其地

自

夜郎滇邛都人皆椎髻左衽邑聚而居知耕田其外西

自桐師以東北至葉榆

葉榆澤名

名為嵩昆明

嵩即今越嵩郡昆明在西

南諸蠻所居

地方數千里無君長辨髮隨畜遷徙無常武帝

開以為邛都縣屬越嵩郡無幾而地陷為汙澤因名為

邛池南人以為邛河其人後復反叛元鼎六年漢兵自

越嵩水伐平之

嵩水源出今越嵩郡西南嵩山下

其土地平原有稻田

俗多遊蕩而喜謳歌畧與牂牁相類豪帥放縱難得制

御王莽時郡守枚根

枚根太
守姓名

調邛人長貴以為軍候更

始三年長貴攻殺枚根自立為邛穀王至光武因就封

之授越雋太守印綬後劉尚擊益州夷路由越雋長貴

聞之即聚兵欲襲尚尚掩長貴誅之徙其家屬於成都

安帝時永昌益州蜀郡夷

並今雲
南郡

皆叛衆十餘萬破壞

二十餘縣益州刺史張喬乃遣從事楊竦將兵至葉榆

破之渠帥三十六種皆來降附竦因奏長吏姦猾侵犯

蠻夷者九十人皆減死論

笮都

笮都者漢時自越雋以東北君長以十數徙

徙漢為縣屬蜀郡

笮都最大武帝開以為笮都縣其人被髮左衽言語多

好譬類居處畧與汶山夷同

汶山夷在蜀郡西北即冉駹也今通化郡

元鼎

六年以為沈黎郡

今洪源郡

至天漢四年并蜀為西部置兩

部尉一居旄牛主徼外夷一居青衣主漢人

旄牛青衣並今蜀郡

之後漢明帝永平中益州刺史朱輔慷慨有大畧宣示

漢德威懷遠夷自汶山以西前代不至正朔所不加白狼

槃木唐菽等

菽阻留反

百有餘國戶百三十餘萬舉種奉貢

稱為臣僕和帝永光十二年旄牛徼外白狼樓薄蠻夷

王唐縉等遂率種十七萬戶口內屬安帝永和元年蜀

郡三襄種夷與徼外汗許種反叛攻蠶陵城

臨翼郡地在蜀郡之

西汗音烏許呼五反

殺長吏二年青衣道夷邑長令田

令姓田名也

與

徼外三種夷三十一萬口舉土內屬後旄牛夷叛攻零

關

零關道屬漢越嵩即今郡

益州刺史張喬與西部尉擊破之於是

分置蜀郡屬國都尉領縣四如太守

冉駹

冉駹漢時自笮以北君長十數冉駹最大其俗土著或

隨畜遷徙在蜀西武帝元鼎六年以為汶山郡

今蜀郡西北通

化郡地

至宣帝地節三年夷人以立郡賦重帝乃省并蜀

郡為北部都尉其山有六夷七羌九氐各有部落其王

侯頗知文書土氣多寒雖在盛夏冰猶不釋皆依山居

止累石為室高者至十餘丈為卬籠

今彼土夷人呼為卬

又土地

剛鹵不生穀粟麻菽唯以麥為資而宜畜牧有旄牛無

角一名犝牛肉重千斤毛可為毼

犝徒冬反
毼音二

出名馬有

羝羊可療毒又有食藥鹿麕有有胎者其腸中有糞

亦療毒疾又有五角羊其西又有三河槃于虜北有黃

石埴地廬水胡其表乃為徼外後漢靈帝時復分蜀郡

北部為汶山郡蜀後主建興十年汶山平康夷反姜維

討破之

附國

附國隋代通馬在蜀郡西北二千餘里即漢之西夷也
有嘉良夷即其東部所居種自相率領不能統一土俗
與附國同言語少殊其人並無姓氏其地南北八百里
東西四千五百里無城柵近川谷傍山險俗好復讐故
疊石為礮而居以避其患其礮與巢字同高至十餘丈下至
五六丈狀似浮圖於下級開小門從內上通夜必關閉
有二萬餘家弓長六尺以竹為弦妻其羣母及嫂兄弟
死父兄亦納其妻好歌舞鼓簧吹長笛有死者無服制

置屍於高床上沐浴衣服以牟甲覆以獸皮子孫不哭
帶甲舞劍而呼云我父為鬼所取我欲報冤殺鬼其俗
以皮為帽形圓如鉢或戴纂羅衣多毛毼裘

毼胡割反

全剝

牛脚皮為靴項繫鐵釧王與酋帥金飾首胸前懸一金
花徑三寸其土高氣候涼多風少雨宜小麥青斜山出
金銀多白雉水有嘉魚長四尺鱗細煬帝大業四年其
王遣子弟宜林率嘉良夷六十人朝貢嘉良有水闊六
七十丈附國水闊百餘丈並南流用皮為舟而濟附國

南有薄緣夷風俗亦同西有女國其東北連山綿亘數
千里接党項及諸羌

按其地接汶
山故為附焉

哀牢

哀牢後漢時通焉其先有婦人名沙壹居於牢山嘗捕
魚水中觸沉木若有感因懷妊十月產男子後沉木化
為龍出水因舐其男之背其母鳥語謂背為九謂坐為
隆因名曰九隆後漸相滋長種人皆刻畫其身象龍文
衣背著尾九隆代代相繼乃分置小王往往邑居散在

溪谷絕域荒外山川阻深生人以來未嘗交通中國光

武建武中其王賢栗等遂率衆人戶二千七百詣越雋

太守鄭鴻降求內屬帝封賢栗等為君長自是歲來朝

貢明帝永平中哀牢王柳貌遣子率種人內屬其稱邑

王者七十人戶五萬一千八百九十四界去洛陽七千

里明帝以其地置哀牢博南二縣

今雲南越雋之西

割益州郡

西部都尉所領六縣

後漢六縣謂不韋雋唐比蘇葉榆邪龍雲南並今雲南越雋之西

合為永昌郡

即今雲南郡

始通博南山渡蘭倉水

華陽國志曰博南縣

西山高三十里行者苦之歌曰漢德廣開不賓度博南越之得蘭倉水

越蘭津渡蘭倉為他人哀牢人皆穿鼻儋耳儋丁甘反其渠

帥自謂王者耳皆下肩三寸庶人則至肩而已土地沃

美宜五穀蠶桑染綵文繡蘭干細布華陽國志曰蘭干獠言紵也織

成文章綾錦有梧桐木華績以為布廣志曰梧桐有白者剝國有桐木其

華有白毳取毳淹績緝以為布幅廣五尺潔白不受垢汙先以覆亡人

然後服之其竹節相去二丈名曰濮竹出銅鐵鉛錫金

銀光珠博物志曰光珠即江珠琥珀水精瑠璃軻蟲蚌珠孔雀翡

翠屏象猩猩貊獸

山海經云猩猩知人名據華陽國志曰永昌郡有猩猩能言取其血可以

染朱罽荀卿子曰猩猩能言笑淮南萬畢術曰婦終知來猩猩知往註云並神獸也後魏酈元注水經云武平郡封溪縣有獸名猩猩後形人面身毛黃安顏端正善學人語聞者無不酸楚太原王綱著傳云阮研曾使封溪見邑人說猩猩好酒及履里人置之山谷常行路百數為羣見酒物等知人設張取之此獸甚靈先知其人祖父姓名而罵曰奴欲殺我捨爾去也既去復還因相呼曰試共嘗酒及飲乃甘其味連手醉皆擒之無遺逸遂置檻中隨其所欲飼之將烹索其肥者乃自推擇泣而遣之又禮記曰猩猩能言廣志云猩猩唯聞其啼不聞其言出交趾郡封溪縣按前代永昌郡即今雲南郡武平郡即今安南郡並封畧之內古謂其靈而智不因人教而解人語殊為珍異秦漢以降天下一家即嶺南獻能言鳥及馴象西域獻汗血馬皆載之史傳以為奇

物復廣異聞聲教遠覃如越裳白雉之類故彰示後代
則猩猩不劣於鳥象何為獨無獻乎獲之以充口實則
致之固難也王莽置漢孺子於西壁中禁人與語及長
不能名六畜猩猩若非靈異自解人語即須因教方成
又不可容易而為庖膳也是知諸家所說不加考覈遞
相祖述耳佑以為廣志尤足徵矣血染朱罽徧問胡商
元無此事故

永昌太守鄭純為政清潔化行夷人與哀

牢夷人約邑豪歲輸布貫頭衣二領鹽一斛為常賦夷
俗安之唐麟德元年五月於昆明之楸棟川置姚州都
督府每年差兵募五百人鎮守武太后神功二年閏十
月蜀州刺史張柬之上表曰姚州者古哀牢之舊國本

不與中國交通前漢唐蒙開夜郎滇筰而哀牢不附至
光武季年始請內屬漢置永昌郡以統理之稅其鹽布
氈罽以利中土其國西通大秦南通交趾奇珍進貢歲
時不闕及諸葛亮五月渡瀘收其金銀鹽布以益軍儲
使張伯岐選其勁卒以增武備前代置郡其利頗深今
鹽布之稅不供珍奇之貢不入而空竭府庫驅率平人
受役夷蠻肝腦塗地漢以得利既多歷博南山涉蘭倉
水更置博南哀牢二縣蜀人愁怨行者作歌蓋漢得其

利人且怨歌今於國家無絲髮之利在百姓受終身之
酷往者諸葛亮破南中使其渠帥自相統領不置漢官
亦不留鎮守臣竊以亮之策妙得羈縻蠻夷之術今姚
府置官既無安邊靜寇之心又無葛亮且縱且擒之術
唯知詭謀狡算恣情割剝貪婪劫掠積以為常扇動酋
渠遂成朋黨提挈子弟嘯引凶愚今見散在彼州專以
掠奪為業姚州本武陵縣主簿石子仁奏置之後長史
李孝讓辛文協並為羣蠻所殺又使將軍李義總往征

郎將劉惠在戰陣死其州遂廢即諸葛亮稱置官留兵
有三不易之言遂驗垂拱四年南蠻郎將王善寶昆州
刺史爨乾福又請置州奏言所有課稅自出姚府管內
更不勞擾蜀川及置州後錄事參軍李稜為蠻所殺延
載年中司馬成琛請於瀘南置鎮七所遣蜀兵防守自
此蜀中騷擾於今不息伏乞省罷姚州使隸舊府歲時
朝覲同之蕃國瀘南諸國悉廢於瀘北置關百姓非奉
使入蕃不許交通往來疏奏不納

南詔

南詔或曰鶴柘曰龍尾曰苴咩曰陽劔本哀牢夷後烏蠻別種夷語王為詔其先渠帥有六詔號六詔曰蒙雋詔越析詔浪穹詔澄暎詔施浪詔蒙舍詔兵埒不能相君長蜀諸葛亮討定之蒙舍詔在諸部南故曰南詔居永昌姚州之間鐵橋之南東距爨東南屬交趾西摩伽佗西北與吐蕃接南女王西南驃北抵益州東北際黔巫王都羊苴咩城別都曰善闡府王自稱曰元猶朕也

謂其下曰昶猶卿爾也官之大者曰清平官以決國事
猶唐宰相也爽猶省也督爽總三省也百家有總佐千
家有治人官萬家有都督一凡田五畝曰雙上官授田
四十雙上戶三十雙以是為差壯者為戰卒有馬為騎
軍一將統千人四軍置一將其外有六節度二都督十
監夷語驗若州云初羣山之西多瘴歟地平草不枯自
曲靖州至滇池人水耕食蠶以柘蠶生閱二旬而蠶大
和祈鮮而西人不蠶剖波羅樹實狀若絮紐縷而幅之

有井產鹽有野桑生石上其材可為弓不筋漆而利長
川諸山有金越睽之西多薦草產善馬婦人不粉黛以
蘇澤髮俗以寅為正四時大抵與中國少差師行以二
千五百人為一營其法前傷者養治後傷者斬犁田一
牛三夫前挽中壓後驅然專於農無貴賤皆耕不繇役
歲輸米二斗一藝者給田二畝乃稅王蒙氏父子以名
相屬自舍龍以來有譜次可考舍龍生細奴邏唐高宗
時遣使者入朝賜錦袍其孫炎閣武后時入朝炎閣立

死開元時弟盛邏皮立生皮邏閣授特進封臺登郡王
炎閣未有子時以閣羅鳳為嗣及生子還其宗而名承
閣遂不改開元末皮邏閣逐河蠻取大和城又襲大釐
城守之因城龍口夷語山陂陀為和故謂大和以處閣
羅鳳天子詔賜皮邏閣名歸義當是時五詔徵歸義獨
彊乃厚以利啖劍南節度使王昱求合六詔為一制可
歸義已并羣蠻遂破吐蕃寢驕大入朝天子亦為加禮
又以破洱蠻功馳遣中人冊為雲南王賜錦袍金鈿帶

七事於是徙治大和城天寶初遣閻羅鳳子鳳迦異入宿衛拜鴻臚卿恩賜七載歸義死閻羅鳳立襲王以其子鳳迦異為瓜州刺史初安寧城有五鹽井人得煮鬻自給元宗詔特進何履光以兵定南詔境取安寧城及井復立馬援銅柱乃還鮮于仲通領劍南節度使卞忿少方畧故事南詔嘗與妻子謁都督過雲南太守張虔陀私之多所求丐閻羅鳳不應虔陀數詬斬之陰表其罪由是忿怨反發兵攻虔陀殺之取姚州及小夷州凡

三十二明年仲通自將出戎雋州分二道進次曲州靖
州閣羅鳳遣使者謝罪願還所擄得自新且城姚州如
不聽則歸命吐蕃恐雲南非唐有仲通怒囚使者進薄
白崖城大敗引還閣羅鳳斂戰齒築京觀遂北臣吐蕃
吐蕃語謂弟為鍾稱贊普鍾給金印號東帝揭碑國門
明不得已叛曰我上世世奉中國累封賞後嗣容歸之
若唐使至可指碑深被吾罪也會楊國忠以劍南節度
當國乃調天下兵凡十萬使侍御史李宓討之輦餉者

尚不在涉海而疫死相踵於道宓敗於太和城死者十
八亦會安祿山反閼羅鳳因之取雋州會同軍據清溪
關以破越析梟於贈西而降尋傳驃諸國尋傳蠻者俗
無絲纊跣履榛棘不苦也射猪生食其肉戰以竹籠頭
如兜鍪其西有裸蠻亦曰野蠻漫散山中無君長作檻
舍居男少女多無田農以木皮蔽形婦或十或五共養
一男子廣德初鳳迦異築柘東城諸葛亮石刻故文曰
碑即仆蠻為漢奴夷畏誓常以石楮梧大歷十四年閼

羅鳳以鳳迦異前死立其孫異牟尋以嗣異牟尋有智
數善撫衆略知書母李獨錦蠻女也獨錦蠻亦烏蠻種
在秦藏川南天寶中命其長為蹄州刺史世與南詔婚
聘異牟尋立悉衆二十萬人寇與吐蕃并力一趨茂州
踰文川擾灌口一趨扶文掠方維白坭一侵黎雅叩叩
邾關令其下曰為我取蜀為東府工伎悉送羅娑城歲
賦一鰵於是進陷城聚人率走山德宗發禁衛及幽州
軍以援東川與山南兵合大敗異牟尋衆斬首六千級

擒生捕傷甚衆顛踣厓峭且十萬異牟尋懼徙苴咩城
築袤十五里吐蕃封為日東王然吐蕃責賦數悉奪其
險立營候歲索兵助防異牟尋稍苦之唐人鄭回為清
平官說異牟尋曰中國有禮義少求責非若吐蕃恠刻
無極也今棄之復歸唐無遠戍勞利莫大於此異牟尋
善之會節度使韋臯撫諸蠻有威惠諸蠻頗得異牟尋
語白臯貞元九年乃遣使者趣成都遺臯書願竭誠自
新歸欵天子請加戍劍南西山涇原等州安西鎮守揚

兵四臨委回鶻諸國所在侵掠使吐蕃勢分力散不能為邊患德宗嘉之賜以詔書異牟尋乃殺吐蕃使迎唐使遣其臣隨使入朝初吐蕃與回鶻戰殺傷甚乃調南詔萬人異牟尋欲襲吐蕃陽示寡弱以三千人行即自將數萬踵後晝夜行大破吐蕃於神川遂斷鐵橋溺死以萬計俘其五王乃遣使入獻地圖方物請復號南詔帝賜賚有加遣使冊異牟尋為南詔王異牟尋迎使拜詔甚恭尋遣清平官入謝貢方物復攻吐蕃取昆明城

以食鹽池又破施蠻順蠻並虜其王置白崖城因定磨些蠻隸昆山西爨故地破茫蠻掠枏棟蠻漢家蠻以實雲南東北十五年異牟尋謀擊吐蕃帝許出兵助又請以大臣子弟為質於臯舍之成都令就學且言昆明雋州與吐蕃接不先加兵為虜所脅反為我患請臯圖之時唐兵比歲屯京西朔方大峙糧欲南北並攻取故地然南方轉饟稽期兵不悉集是夏吐蕃飢疫贊普死新君立臯揣虜未敢動勸異牟尋緩舉會吐蕃大臣謀襲南

詔臯乃命部將屯黎嵩二州為援既而吐蕃五萬分二軍攻雲南一軍攻嵩州臯將扶忠義取末恭城俘係牛羊千計吐蕃將馬定德監軍野多輸煎等俱來降虜氣衰軍不振無功而還期以明年吐蕃苦唐詔犄角亦不敢圖南詔異牟尋比年獻方物天子禮之元和三年異牟尋死遣使弔祭子尋閣勸立或謂夢湊自稱驃信夷語君也改賜元和印章明年死子勸龍晟立淫肆不道上下怨疾十一年為楸棟節度王嵯巔所殺立其弟勸

利詔少府少監李銑為冊立弔祭使勸利德嵯巔賜氏
蒙封大容蠻謂兄為容長慶三年始賜印是歲死弟豐
祐立豐祐趨敢善用其下慕中國不肯連父名穆宗使
京兆少尹韋審規持節臨冊豐祐遣洪成酋趙龍些楊
定竒入謝天子於是西川節度使杜元穎治無狀障候
弛沓相蒙時大和三年也嵯巔乃悉衆掩郾成雋三州
陷之入成都止西郭十日慰賚居人市不擾肆將還乃
掠子女工技數萬引而南人懼自殺者不勝計救兵逐

嵯巔身自殿至大度河謂華人曰此吾南境爾去國當
哭衆號慟赴水死者十三南詔自是工文織與中國埒
明年上表請罪比年使者來朝開成會昌間再至大中
時李琢為安南經畧使苛墨自私以斗鹽易一牛夷人
不堪結南詔將段酋遷陷安南都護府號白末沒命軍
南詔發朱弩佉苴三千助守然朝貢猶歲至從者多杜
悰自西川入朝表無內蠻僭豐祐怒即慢言索質子會
宣宗崩使者告哀是時豐祐亦死坦綽酋龍立憲朝廷

不弔卹又詔書乃賜故王以草具進使者而遣遂僭稱
皇帝建元建極自號大禮國懿宗以其名近元宗嫌諱
絕朝貢乃陷播州安南都護李鄴屯武州咸通元年為
蠻所攻棄州走明年攻邕管詔湖南觀察使蔡襲發諸
道兵二萬屯守南詔憚畏不敢出會詔左庶子蔡京經
制嶺南忌襲功奏罷其兵南詔乃攻交州進略安南陷
之詔諸軍保嶺南更以秦州經略使高駢為安南都護
南詔稍逼邕州乃大興諸道兵益戍又分兵屯容藤披

蠻勢置行交州於海門五年南詔回掠雋州以搖西南
西川節度使蕭鄴率屬蠻鬼主邀南詔大度河敗之明
年復來攻盡殺戍卒時安南久屯兩河銳士瘴毒死者
十七高駢以選士五千度江敗林邑兵於邕州遂攻交
州戰數勝士酣鬪斬首三萬級安南平十年酋龍復入
寇陷嘉州黎州進攻成都次眉州蠻本無謀不能乘機
會鼓行亟驅但虬結蠅營怙鹵剽小利處處留屯故蜀
孺老得扶攜悉入成都閭里皆滿蠻傳外郭西川節度

使盧耽遣將出兵三面苦戰蠻引却帝遣東川節度使
顏慶俊以兵應接蠻聞鳳翔山南軍且來乃迎戰王師
燒其攻具蠻大敗乃引去酋龍年少嗜殺戮親戚異已
者皆斬兵出無寧歲男子十五以下悉發婦耕以餉軍
十四年復寇蜀攻大度河陷黎州入邛州成都大震城
中固守蠻至新津而還回寇黔中俄攻黎州僖宗乾符
元年劫掠雋雅間破黎州入邛崃關掠成都閉三日乃
去詔以高駢領西川節度使駢至閱精騎五千逐蠻至

大度河奪鎧馬執酋長五十斬之收邛崃關復取黎州
南詔遁還酋龍使奉書丐和駢答曰我且將百萬衆至
龍尾城問爾罪酋龍大震自南詔叛天子數遣使至其
國酋龍不肯拜使者遂絕駢以其俗尚浮屠法故遣浮
屠景仙攝使酋龍與其下迎謁且拜乃定盟而還遣清
平官酋望趙宗政質子二十八朝乞盟請為兄弟若舅
甥詔拜景仙鴻臚卿檢校左散騎常侍駢結吐蕃尚延
心嗚未魯耨月等為間築戎州馬湖沐源川大度河三

城列屯拒險料壯卒為平夷軍南詔氣奪酋龍恚發疽
死偽謚景莊皇帝子法嗣改元貞明承智大同自號大
封人法年少好畋獵酣逸衣絳紫錦罽鍔金帶國事顯
決大臣乾符四年遣陀西段瑳寶詣邕州節度使辛讜
請修好詔使者答報未幾寇西川駢奏請與和親右諫
議大夫柳韜吏部侍郎崔澹醜其事上言遠蠻畔逆乃
因浮屠誘致入議和親垂笑後世駢職上將謀乖謬不
可從遂寢蠻使者再入朝議和親而駢從荆南持前請

不置宰相鄭畋盧攜爭不決皆罷帝手詔問崔安潛和親事答曰雲南姚州譬一縣中國何資於彼而遣重使加厚禮彼且妄謂朝廷畏怯無能脫有他請何以待之且天宗近屬不可下小蠻夷南詔知蜀強故襲安南陷之都護會充奔邕府戍兵潰會西川節度使陳敬瑄申和親議時盧攜復輔政與豆盧瑑皆厚駢入譎說帝曰咸通以來蠻始叛命再入安南邕管一破黔州四盜西川遂圍盧耽召兵東方戍海門天下騷動十有五年中

藏空虛士死瘡癘可謂痛心今朝廷財匱兵少安南客
戍單寡涉冬寇禍可虞誠命使臨報縱未稱臣且伐其
謀外以縻服蠻夷內得蜀休息也帝謂然乃以宗室女
為安化長公主遣使許婚使還具言驃信誠款以為敬
瑄功進其官南詔遣其宰相趙隆眉楊奇混段義宗朝
行在迎公主高駢自揚州言三人南詔腹心宜止而鵠
之蠻可圖也帝從之隆眉等皆死自是謀臣盡矣蠻亦
衰法死偽諡聖明文武皇帝子舜化立遣使款黎州修

好昭宗不答後中國亂不復通後唐同光三年既平蜀
魏王繼岌奏齋書招諭南詔蠻天成元年供奉官李彥
楷等雲南使回雋州山後兩林百蠻都鬼主右武衛將
軍李早晚差大鬼主傅能阿花等來朝貢明宗引見加
其官遣還二年七月遣使入蠻九月西川奏據黎州狀
申雲南使趙和於大度河南起舍一間留信物十五籠
并雜詩一卷遞至闕下宋太祖鑒唐之禍基於南詔乃
棄越雋諸郡以大度河為界使欲為寇則不能為臣則

不得橫山有寨宜管以西虎頭關九十里險甚所在把握峒丁結聚道路荒僻大理益不通於中國皇祐中儂智高敗奔大理其國捕之以聞熙寧九年遣使貢方物自後不常來亦不領於鴻臚政和三年廣州觀察使黃璘奏南詔大理慕義懷來願為臣妾欲聽其入貢詔置局於賓州六年遣進奉使李紫琮等過鼎州請詣學瞻拜宣聖像許之遂遍謁見諸生又乞觀御書閣閱讀御製舉笏叩首七年至京師貢馬及麝香等制以其王段


和譽為金紫光祿大夫檢校司空雲南節度使上柱國大理國王高宗紹興三年廣西奏大理國欲進奉及賣馬事上曰令賣馬進奉可勿許彼之進奉實利賈販但令帥臣邊將償其馬直當價則馬當繼至庶可增諸將騎兵不為無益也六年廣西經畧司奏大理人使進奉表章國信及象馬約五月至橫山詔所進方物除不受外餘驛付行在仍計價優與回賜章表等遞降勅書
回答

石湖范氏桂海虞衡志曰大理南詔國也本唐小夷
蒙舍詔在諸部最强故號南詔自皮邏閣併五詔為
一受冊封雲南王至異牟尋封南詔王至酋龍而稱
驃信改元自稱大禮國今其與中國接乃稱大理國
與唐史禮理字異未詳所始大理地廣人庶器械精
良前志載之詳矣邕州右江水與大理大槃水通大
槃在大理之威楚府而特磨道又與其善闡府者相
接自邕州道諸蠻獠至大理不過四五十程產良馬

可與橫山通北梗自杞南梗特磨久不得至語在大
理馬條下乾道癸巳冬忽有大理人李觀音得董六
斤黑張般若師等率以三字為名凡二十三人至橫
山議市馬出一文書字畫畧有法大畧所湏文選五
臣註五經廣注春秋後語三史加註都大本草廣註
五藏論大般若十六會序及初學記張孟押韻切韻
玉篇集聖歷百家書之類及須浮量銅器并碗疑即
饒州
浮梁磁器
書梁作量琉璃碗壺及紫檀沉香水甘草石決明并

泉石蜜陀僧香蛤海蛤等藥稱利正二年十二月其
後云古人有云察實者不留聲觀行者不識詞知己
之人幸逢相謁言音未同情慮相契吾聞夫子云君
子和而不同小人同而不和今兩國之人不期而會
者豈不習夫子之言哉續繼短章伏乞斧伐短章有
言音未會意相和遠隔江山萬里多之語其人皆有
禮儀擎誦佛書碧紙金銀字相間邕人得其大悲經
稱為坦綽趙般若宗祈禳目疾而書坦綽酋望清平

官皆其官名也邕守犒來者厚以遣歸然南詔地極西南當為西戎尤邇蜀都非桂帥所當鎮撫



文獻通考卷三百二十九